

आकाशवाणी

खबरां

1. स्ट्रेट आफ होमुर्ज दे राएं एलएनजी दी खेप गी परतियै शुरू करने दे मगरा सरकार नै प्राकृतिक गैस दी आपूर्ति पर आपातकालीन रोक परताई लैती ऐ।
2. केंद्री ग्रामीण विकास मंत्री शिवराज सिंह चौहान होरें विकसित भारत रोजगार ते आजीविका मिशन (ग्रामीण) कनून तैहत 25 ज्हार करोड़ रुपें दी मदद जारी कीती।
3. केंद्र सरकार नै मेंटा गी इंस्टाग्राम थमां बाल दुव्यवहार दे विज्ञापन हटाने दा हुकम दित्ता ते 7एं दिनें च जवाब मंगेआ ऐ।
4. छत्तीसगढ़ दे मशहूर पांडवाणी गायक तीजन बाई हुंदा काल होई गेआ। राष्ट्रपति, उपराष्ट्रपति ते प्रधानमंत्री होरें उंदी मौती पर बसोस बुज्जेआ।
5. भारती मौसम विभाग नै अज्ज गुजरात, कोंकण, गोवा, मध्य महाराष्ट्र ते ओडिशा च मती भारी बरखा दे सरबंधे च रेड अलर्ट जारी कीता।
6. आई.सी.सी महिला टी-20 विश्व कप दे फाइनल च इंग्लैंड दा मुकाबला अज्ज संज्ञा लंदन च आस्ट्रेलिया कन्नै होग।

<><><><><><>

**Natural Gas Curbs**

पच्छमी एशिया दे टकराव च युद्ध विराम दे मगरा स्ट्रेट आफ होमुर्ज राएं तरल प्राकृतिक गैस एलएनजी दी शिपमेंट परतियै शुरू होने मगरा सरकार ने प्राकृतिक गैस दी आपूर्ति पर आपातकालीन रोक वापस लैती ऐ। पेट्रोलियम ते प्राकृतिक गैस मंत्रालय नै इक अधिसूचना च आखेआ ऐ जे प्राकृतिक गैस (आपूर्ति नियमन) आर्डर 2026 च संशोधन करियै मुख् आपातकालीन प्रावधानें गी हटाई दित्ता गेआ ऐ जेदे कन्नै सरकार गी घरेलू तौर पर पैदा कीती गेदी प्राकृतिक गैस ते आयातित एलएनजी दे आबंटन गी प्राथमिकता देने दी खुल्ली दित्ती गेई ही। स्ट्रेट आफ होमुर्ज राएं एलएनजी दी शिपमेंट च विघ्न दे मगरा इस बरे मार्च म्हीने जरूरी चीजें सरबंधी कनून तैहत आपातकालीन आर्ड जारी कीता गेआ हा।

<><><><><><>

**VB-G Ram G**

केंद्री ग्रामीण विकास मंत्री शिवराज सिंह चौहान होरें खुशी जताई ऐ जे विकसित भारत रोजगार ते आजीविका मिशन (ग्रामीण) लेई गारंटी वी.बी जी राम जी एक्ट 2025, इस म्हीने दे पेहले दिन कामयाबी कन्नै लागू होई गेआ ऐ। मंत्री होरें अज्ज मिशन तैहत राज्यें गी वीडियो कांफ्रेंसिंग दे राएं 25 ज्हार करोड़ शा मते रुपें दी पैहली किशत (माता मंजूरी) जारी कीती। चौहान होरें सबनें राज्यें तें केंद्र शासित प्रदेशें दे ग्रामीण विकास मंत्रिएं कन्नै वी.बी जी राम जी गी लागू करने दी बी समीक्षा कीती। उनें आखेआ जे अज्ज जारी कीती गेदी किशत दा मकसद एहू यकीनी बनाना ऐ जे राज्यें च पर्याप्त फंड होऐ तां जे 15एं दिनें दे अंदर मंजूरी दित्ती जाई सकै।

<><><><><><>

**PM-Indonesia Visit**

प्रधानमंत्री नरेंद्र मोदी हुंदे कल्लै थमां शुरू होआ'रदे इंडोनेशिया दे दौरे कन्नै दौनें मुख् बश्कार मौजूदा सरबंधें गी बढावा थ्होग ते साथ-सहयोग दे नमें मौके बी खुल्लडन। जकार्ता च आकाशवाणी गी दित्ते गेदे इक इंटरव्यू च इंडोनेशिया च भारत दे राजदूत संदीप चक्रवर्ती होरें आखेआ जे 6 थमां 8 जुलाई तगर मोदी हुंदे दौरे दरान भारत ते इंडोनेशिया बश्कार साथ-सहयोग दे केई नमें क्षेत्र सामने औडन। उनें आखेआ जे एहू सरबंध होर मजबूत होंगन ते आर्थिक साथ-सहयोग बी मजबूत होग कीजे भारत ते इंडोनेशिया बश्कार कोई विवाद जां मतभेद नेई ऐ। दौनें मुख् सामरिक साथ-सहयोग बढाने ते विकसित भारत ते स्वर्णिम इंडोनेशिया दी दिशा च कम्म करने बक्खी दिक्खा'रदे ना।



## BRICS-Women Working Group

भारत ब्रिक्स महिला कार्यकारी समूह दी दो रोजा बैठक दी मेजबानी करग जेडी कल केरल दे कोच्चि च शुरू होआरदी ऐ। महिला ते बाल विकास मंत्रालय नै आखेआ ऐ जे ब्रिक्स दे सदस्य मुल्खें दे सीनियर अधिकारी किट्टे रलियै सब्भनें सैक्टरें च महिला सशक्तिकरण ते महिलाएं दी अगुवाई आले विकास कन्नै जुडे दे बड्डे मुद्दें पर चर्चा करंगन ते कन्नै गै सांझी प्राथमिकता पर सहयोग बी बधांगन।



## EAM-Visit

विदेश मंत्री डा. एस जयशंकर होर अज्जै थमां 10 जुलाई तगर कतर, बहरीन, कुवैत ते ओमान दे सरकारी दौरे पर जा'रदे ना। इस दरान ओहू इनें देशें दे विदेश मंत्रिणें ते नेताएं कन्नै मलाटी करंगन। विदेश मंत्रालय नै आखेआ ऐ कि इस जाततरा दा मकसद इनें मुल्खें कन्नै भारत दे दपकखी सरबंधें गी मजबूत करना ते इलाकाई घटनाक्रमें ते सांझे हितें दे मुद्दें पर बिचार बटांदरा करना ऐ। कतर, बहरीन, कुवैत ते ओमान दा दौरा मुकम्मल करने दे बाद विदेश मंत्री होर 13 जुलाई गी न्यूयाक्र च संयुक्त राष्ट्र सुरक्षा परिषद दे 2028-29 आहले कार्जकाल लेई भारत दा अभियान शुरू करंगन।



## Govt. Notice Meta

सरकार नै सोशल नेटवर्किंग साइट इंस्टाग्राम पर कीते गेदे विज्ञापनें च बाल यौन शोषण ते दुब्र्यवहार सामग्री पर मेटा गी सख्त नोटिस जारी कीता ऐ। अधिकारिक सूत्रें दस्सेआ ऐ जे सरकार नै इंस्टाग्राम गी आदेश दिता ऐ जे ओहू सब्भनें विज्ञापनें ते सामग्री गी अयोग्य करन जेडी गाली गलोच आहली सामग्री गी बढावा देने ते उंदी पुज्ज गी सुविधाजनक बनांदे ना। इलेक्ट्रानिक्स ते आई.टी मंत्रालय नै मेटा थमां 7एं ध्याडे दे अंदर-अंदर इस बारै विस्तार कन्नै सफाई देने दी मंग कीती ऐ। सरकार इस गल्लै दी समीक्षा करा करदी ऐ जे इस प्लेटफाम्र नै भारत दे बिचनौलियें सुरक्षा दिशा निर्देशें दा पालन कीता ऐ जां नेई।



## Teejan Bai Dies

छत्तीसगढ दे मशहूर पांडवाणी गायक ते पदम विभूषण कन्नै सम्मानित डा. तीजन बाई हुंदा काल होई गोआ ऐ। ओहू लम्मी बिमारी कन्नै पीडित हे ते एम्स रायपुर च इलाज करा करदे हे। डा. तीजन बाई हुंदा अज्ज संज्ञा दुर्ग जिले दे उंदे पैतृक ग्रं गनियारी च पूरे राज्य सम्मान कन्नै अखीरी संस्कार कीता गोआ। अपनी दमदार अवाज, मजबूर करने आली मंच पर मौजूदगी ते कथन दी विशिष्ट शैली कन्नै तीजन बाई होरें पांडवाणी गी न सिर्फ समूलचे भारत च सगुआं अंतरराष्ट्री स्तर पर बी इक नमीं पंछान दिती।



## Rajju-Monsoon Session

संसदीय मामलें दे मंत्री किरण रिजिजू होरें जानकारी दिती ऐ जे राष्ट्रपति द्रौपदी मुरमू होरें 20 जुलाई थमां 13 अगस्त धोडी संसद दे मानसून इजलास सद्दने दे सरकार दे प्रस्ताव गी मंजूरी देई दिती ऐ। इस सत्र च राष्ट्रीय म्हत्व आहले मुद्दे उप्पर उचित बैहस-चर्चा ते फैसलें उप्पर खास जोर दिता जाग।



## MoS-Geneva Delegation

विदेश राज्यमंत्री कीर्तिबर्धन सिंह कल्लै थमं स्विट्जरलैंड दे जिनेवा जा'रदे भारती प्रतिनिधिमंडल दी अगुवाई करंगन ते ए.आई गर्वनेंस बारै संयुक्त राष्ट्र दी पैहली वैश्विक वार्ता च हिस्सा लैंगन। विदेश मंत्रालय नै आखेआ ऐ कि ए.आई गर्वनेंस पर वैश्विक गल्लबात दुनिया भरै च इक बहुहितधारक यू.एन फोरम ऐ जेडी संयुक्त राष्ट्र महासभा दे इक प्रस्ताव तैहत कायम कीता गोआ ऐ।



## Govt. Onion Price

सरकार नै गंडें दे भाएं पर काबू रखने आस्तै सरकारी भंडार लेई गंडें दी खरीद कीमतें च 13 फीसदी बाढा कीता ऐ। हून करसानें थमां प्याज 18 सौ 75 रुपें फी क्वांटल दे थाहर 21 सौ 25 रुपें फी क्वांटल दे स्हाबै खरीदेआ जाहग।

खुराक उपभोक्ता मामले ते सार्वजनिक बंड बिक्री सरबन्धी मंत्रालय नै दस्सेआ ऐ एह नमीं खरीद कीमतां तुरत प्रभाव थमां लागू होई सकदियां ना। मंत्रालय दे मताबक बधी दिये खरीद कीमते कन्नै गंडा दे करसाने गी बेहतर लाह हासल होग ते कन्नै गै बफर खरीद आस्तै गंडा खरीदने दे प्रयासें गी बी मदाद थहोग।

<><><><><><>

## IMD

भारत दे मौसम विभाग नै अज्ज गुजरात, कच्छ, कोंकण, गोवा, मध्य महाराष्ट्र ते ओडिशा च भारी थमां मती भारी बरखा ते होर केई थाहरे बड़ी भारी बरखा लेई रेड अलर्ट जारी कीते दा ऐ जिसलै जे छत्तीसगढ़, पूर्वी मध्य प्रदेश, पूर्वी राजस्थान, कर्नाटक, तेलंगाना ते विदर्भ लेई रेड अलर्ट ते जारी नेई कीता गेदा पर उत्थे बी बरखा दी मेद दस्सी गेदी ऐ। तोआई, असम, मेघालय, तटीय आंध्र प्रदेश, पच्छिम बंगाल दे पानी लग्ग इलाके हिमाचल प्रदेश, केरलम ते माहे च तेज बरखा दी संभावना जाहिर कीती गेदी ऐ। जिसलै जे मराठवाड़ा, नागालैंड, मणिपुर, मिजोरम, त्रिपुरा, तमिलनाडू, पुदुचेरी, कराईकल, उत्तराखंड ते पच्छमी राजस्थान च बी बरखा पौने दे असार दस्से गेदे ना।

<><><><><><>

## Maharashtra-Rainfall

महाराष्ट्र च पिछले 24 घंटे च राज्य दे केई हिस्सें च मती थमां मती बरखा होई जेदे चलदे पानी दा भंडारण, रूख-बूहटे ढहेई पौने, नदिये-नाले च पानी चढी गेआ ते डैमें ते जलाशये च पानी दा स्तर गधी गेआ। मुम्बई च पिछले 24एं घंटे च मती बरखा होई ऐ ते शैहरे च केई हिस्सें च 250 मिलीमीटर शा मती बरखा होई ऐ।

<><><><><><>

## Women's T-20 WC

आई.सी.सी महिला टी-20 विश्व कप च इंग्लैंड दा मुकाबला अज्ज लंदन दे लार्डस क्रिकेट मैदान च फाइनल च आस्ट्रेलिया कन्नै होग। आस्ट्रेलिया नै सेमीफाइनल च वेस्ट इंडीज पर जित्त हासिल करियै फाइनल च अपनी थाहर पक्की कीती ऐ जिल्ले के इंग्लैंड नै वीरवारें दक्खन अफ्रीका गी हराइयै लगातार 6मीं जित्त दर्ज कीती।

<><><><><><>

## FIFA-WC

फीफा विश्व कप च फ्रांस नै फिलाडेल्फिया च 16में दौर च पराग्वे पर 1-0 कन्नै जित्त हासल करियै क्वार्टर फाइनल च अपनी थाहर पक्की कीती। वीडियो सहायक रेफरी-वी.ए.आर ने फ्रांस गी स्पॉट किक देने दे बाद 70में मिनट च कप्तान काइलियन एमवाप्पे नै पेनल्टी स्पॉट थमां मैच दा इक्कला गोल कीता। फ्रांस दा मुकाबला हुन क्वार्टर फाइनल च मोरक्को कन्नै होग।

<><><><><><>

## SANJY-Darshan

इस बरे सलाना श्री अमरनाथ जी दी जात्तरा दी शानदार शुरूआत होई ऐ ते तीर्थ जात्तरा दे पैहले दो दिनें च गे 32 ज्हार 313 श्रद्धालुएं पवित्र गुफा च अमरनाथें दे हिमलिंग रूप दे दर्शन कीते ते पूजा-अर्चना कीती। आकाशवाणी दे जम्मू संवाददाता नै जानकारी दिती ऐ जे जात्तरा दे दुए रोज 20 ज्हार 145 श्रद्धालुएं भगवान शिव दे दर्शन कीते। दुए ध्याडे आए दे श्रद्धालुएं च 14 ज्हार 611 मर्द, 4 ज्हार 480 महिलां, 379 न्यानें, 142 साधू, 35 साध्वियां, 17 ट्रांसजेंडर ते 481 सुरक्षाकर्मी शामिल हे। अमरनाथ जात्रिएं तीर्थ जात्तरा पूरी करने दे बाद रामबन जिले दे बनिहाल ट्रांजिट प्वाइंट पर अपने तजुर्बे सांझे कीते।

<><><><><><>

## SDRF-Response Camp

अमरनाथ जात्तरा करा'रदे श्रद्धालुएं दी सुरक्षा यकीनी करने लेई एस.डी.आर.एफ नै जम्मू-श्रीनगर राष्ट्री जरनैली शिडकै पर चनैनी दे प्रेम मंदरै कश 24 घंटे सेवां उपलब्ध कराने आला इक आपात प्रतिक्रिया केंप खडेरेआ ऐ। जात्तरा आले रस्ते पर कुसै बी हादसे, मेडिकल सरबन्धी आपात स्थिति जां कोई होर कुदरती आपदा थमां निब्वड़ने

आस्ते इस कैप गी कायम कीता गेआ ऐ जेड़ा अज्जै-कल्लै दिएं तकनीकें कन्नै ते जान बचाने आले उपकरणें कन्नै लेस ऐ। जिआं जे बहचा लेई रस्सियां, स्ट्रेचर, फ्रूट एंड किट्टां, आक्सीजन सपोर्ट सिस्टम बगैरा।

<><><><><><>

### LG-Nunwan Base Camp

उपराज्यपाल मनोज सिन्हा होरें अज्ज पहलगाम च श्री अमरनाथ जात्तरा दे नुनवन आधार शिविर दा दौरा लाइयै वरिष्ठ अधिकारिएं दे कन्नै जात्तरा प्रबंधन दी समीक्षा कीती। इस मौके उप्पर जात्तरा कन्नै जुडे दे बक्ख-बक्ख पैह्लुएं पर ब्यौरेवार चर्चा कीती गेई जिं'दे च श्रद्धालुएं दी आओआई, सुरक्षा सरबंधी उपाऽ, श्रद्धालुएं दे रौहने-बौहने सरबंधी बंदोबस्त, पंजीकरण दी प्रक्रिया ते साज-समेयान सरबंधी होर दुइयां जरूरतां मुख तौर पर शामिल हिआं। इस मौके पर एलजी होरें अधिकारिएं गी निर्देश दित्ते जे ओहू हर इक श्रद्धालु गी जात्तरा पंजीकरण दे महत्व बारै जानकार बनाने दे कन्नो-कन्नी सबनें श्रद्धालुएं दी सुरक्षा ते आराम दा पूरा-पूरा ख्याल रक्खन। अपने दौरे दरान श्री सिन्हा होरें श्रद्धालुएं कन्नै गल्लबात बी कीती ते उ'नेंगी जकीन दोआया जे प्रशासन उं'दी जात्तरा गी सुरक्षित ते बवस्थित बनाने च कोई कसर बाकी नेई छोड़ग।

<><><><><><>